


Ni Pangulong
Thomas S. Monson



Ang Kalibutan Nagakinahanglan sang mga Pionero sa Karon

Para sa kadam-an, ang pagpanglakaton sang mga pionero sang tuig 1847 wala nagsugod sa Nauvoo, Kirtland, Far West, ukon New York kundi sa malayo nga England, Scotland, Scandinavia, ukon Germany. Indi lubos nga mahangpan sang magagmay nga kabataan ang dako nga pagtuo nga nagtulod sa ila mga ginikanan nga bayaan ang ila pamilya, mga abyan, katawhayan, kag seguridad.

Ang isa ka diutay nga bata ayhan nakapamangkot, “Nay, ngaa mahalin kita sa balay? Diin kita makadto?”

“Dali na, pangga; makadto kita sa Sion, ang siyudad sang aton Dios.”

Nagapatunga sa kasulhay sang puluy-an kag sa promisa sang Sion amo ang mabalod kaayo kag delikado nga mga tubig sang dako nga Atlantiko. Sin-o ang makasugid sang kahadlok nga nagpuno sang tagipusuon sadtong mga pionero sa tion sadtong delikado nga mga pagtabok? Tungod napaisog sang mahinay nga mga hutik sang Espiritu, napursigi sing simple apang mabaskog nga pagtuo, yadtong mga pionero nga Santos nagsalig sa Dios kag naglayag sa pagbiyahe.

Sang ulihi nakalab-ot gid man sila sa Nauvoo pero naghalin naman agud magpangatubang sang mga

kabudlayan sa pagpanglakaton. Mga tanda nga bato kag sanga sang kahoy-kahoy ang nagmarka sang mga lulubngan nga yara sa bug-os nila nga gin-agyan halin sa Nauvoo pakadto sa siyudad sang Salt Lake. Amo yadto ang sakripisyo sang pila ka mga pionero. Ang ila mga lawas ginlubong, apang ang ila mga ngalan nagapadyon sa gihapon.

Ang kapoy nga mga baka nagahinay-hinay, ang mga ruyda sang mga karwahe nagaigot, ang maisog nga mga kalalakihan nagahimud-os, ang mga tambor [drum] sang giyera nagatunog, kag ang mga lobo nagainuwang. Apang ang mga pionero nga napaisog sang ila pagtuo kag napilitan nga magsulong (tungod sang mabudlay nga mga sirkumstansya) nagpadayon sa ila pagpanglakaton. Masami sila nga nagakanta:

*Kari, kari, kamo mga Santos;
Lakat sa kalipay.
Bisan ‘budlay ining panglakaton,
Grasya mangin aton. . . .
Ang tanan Matawhay!*¹

Ining mga pionero nakadumdom sang mga pulong sang Ginuo: “Ang akon mga katawhan kinahanglan nga

matilawan sa tanan nga mga butang, agud sila mangin handa sa pagbaton sang himaya nga gintigana ko para sa ilá, nga amo ang himaya sang Sion.”²

Ang paglipas sang panahon makapalipat sa aton kag makapabuhin sang aton kapasalamatán para sadtong mga nagpanglakton sa banas sang kasakit, nga nagbilin sang alagyan nga namarkahan sang mga luha para sa wala'y ngalan nga mga lulubngan. Apang ano naman ang parte sa mga hangkat sa karon? Wala bala sing batuhon nga mga dalan nga laktan, wala sing mahawa nga mga bukid nga taklaron, wala sang mga gawang nga tabukon, wala sing bag-ong mga alagyan nga tukibon, wala sang mga suba nga ubugon? Ukon may yara bala sang matuod-tuod nga kakinahanglan sa karon para sinang espiritu sang pagka-pionero nga maggiya sa aton palayo sa mga peligro nga nagahana nga maglamon sa aton kag agud nga magtuoyto sa aton sa isa ka Sion sang kaluwasan?

Sa pila na ka dekada humalin sang pagtapos sang Ika-duhang Inaway Kalibutanon, ang mga sulundan sa moralidad wala untat nga naganubo. Ang krimen padayon nga nagataas; ang pagkadisente padayon nga naganubo. Madamo ang nagasakay sa higante nga roller coaster sang disgrasya, nga ginatinguhaan nga maagom ang makadali nga kasadyahan samtang ginasakripisyó ang mga kalipayan sang wala'y katapusan. Gani ginasakripisyó naton ang paghidaet.

Ginakalipatan naton kon paano ang mga Greko kag mga Romano nangin madinalag-on sa isa ka mabangis nga kalibutan kag kon paano inang kadalag-an natapos—kon paano ang kauyaya kag kahuyang sa ulihi naglamon sa ila padulong sa ila kalaglagan. Sa katapusan, labaw sangsa kahilwayan, luyag nila ang seguridad kag ang isa ka masulhay nga pangabuhi; kag nadula ini tanan sa ila—ang kasulhayán kag seguridad kag kahilwayan.

Indi magpadaug sa mga pagpangganyat ni Satanas; kundi, tindugan gid kag pangapinan ang kamatuoran. Ang wala matuman nga mga handum sang kalag indi masabat sang wala untat nga paglagas sang kalipay sa tunga sang lawasnon nga mga kasadyahan kag mga bisyo. Ang bisyo wala gid nagapadulong sa kaayuhan. Ang dumot wala gid nagasakdag sang paghigugma. Ang katalaw wala gid nagahatag sang kaisog. Ang pagduda wala gid nagainspirar sang pagtuo.

Ang iban nabudlayan mag-agwanta sang pangyaguta kag mga pang-insulto sang tonto nga mga tawo nga nagahikay sang pagkaputli [chastity], pagkatampad, kag pagkamatinumanon sa mga kasuguan sang Dios. Apang ang kalibutan wala gid man nagahatag importansya sa pagtuman sang mga prinsipyó. Sang si Noe ginsugo nga maghimo sang arko, ang tonto nga mga tawo nagtangla sa masanag nga kalangitan kag dayon nangyaguta kag nagkinadlaw—tubtob nga nagtupa ang ulan.

Dapat bala naton sulit-sulit nga mabatian ining mga leksyon sing tuman kamahal? Ang panahon nagabag-o, apang ang kamatuoran nagapadayon. Kon indi kita makatuon gikan sa mga eksperiensia sang nagliligad, nasentensiyan kita nga masulit ang mga ini upod sang tanan sini nga kasakit, pag-antos, kag kalisud. Wala bala kita sang kaalam nga tumanon Sia nga among nakahibalo sang ginsuguran halin sa katapusan—ang aton Ginuo, nga among nagdesinyo sang plano sang kaluwasan—sangsa sinang man-og, nga naghikay sang iya sini katahum?

Ang isa ka diksiyonaryo nagalaragway sang tinaga nga pionero bilang “isa nga nagapanguna agud ihanda ukon buksan ang alagyan para sundon sang iban.”³ Sarang bala naton tipunon ang kaisog kag kabakod sang katuyuan nga naglarawan sa mga pionero sang isa ka nagligad nga henerasyon? Sarang bala ikaw kag ako, sa pagkamatuod, nga mangin mga pionero?

Nakahibalo ako nga sarang kita mangin amo sini. O, daw ano kakinahanglan sang kalibutan sang mga pionero sa karon!

MGA TANDA

1. “Come, Come, Ye Saints,” *Hymns*, no. 30.
2. Doctrine and Covenants 136:31.
3. *Oxford English Dictionary*, 2nd ed. (1989), “pioneer.”

PAGTUDLO GIKAN SA SINING MENSAHE

Ang balaan nga mga kasulatan nagapaathag nga ang mga home teachers dapat “magpaandam, magpa-athag, magpaisog, kag magtudlo, kag mag-agda sa tanan nga magkari kay Cristo” (D&C20:59). Binagbinaga ang pagtudlo sang mga paandam kag mga pangagda nga nalakip sa mensahe ni President Monson sa sinang inyo mga ginabisitahan. Mahimo ninyo hambalan upod sa ila ang mga paagi sa pagkilala kag pagsunod sang matarong nga mga halimbawa, paglikaw sa mga

pagpanonto, kag pagtuon gikan sa mga sala sang iban. Pamangkuta inang inyo mga ginatudloa kon paano sila sarang mangin mga pionero sa karon.

LAMHARON

Gintulod sang Pagtuo

Ni Maggi Earl

Indi ko gid malipatan ang paglibot-libot sa Winter Quarters, Nebraska, USA, sa diin ang mga pionero nagpuyo pila na katuig ang nagligad. Ang palibot daw kasagrado, nga halos pareho nga nagabisita ako sa gwa sang templo.

Naglumaw-lumaw ang akon mga mata sa bagay nga nagburon ang akon pananawan. Nakakita ako sang isa ka estatwa apang indi ko maklaro kon ano ini. Sang ginbahid ko ang akon mga luha, nakita ko ang isa ka lalaki kag isa ka babayi nga ang mga nawong puno sang kasubo. Sang ginpalapitan ko, nakita ko ang porma sang isa ka lapsag nga yara sa isa ka lulubngan sa ila tiilan.

Ining talan-awon nagpuno sa akon sang tuman nga emosyon: kasubo, kaakig, kapasalamat, kag kalipay. Luyag ko kontani kuhaon ang sakit nga ginbatyag sad-tong mga Santos, apang nagpasalamat man ako sa ila ginsakripisyoo para sa ebanghelyo.

Ang akon eksperiensya sa Winter Quarters nagbulig sa akon nga marealisar nga ang Amay nga Langitnon nagahatag sang ebanghelyo sa lya mga kabataan kag nagaugot sa ila nga magpili kon ano ang ila luyag nga himuan sa sini. Ang mga ginikanan sadtong lapsag sarang kontani nga magpili kon ano ang mas mahapos. Ang pagsunod sa propeta kag pagpangabuhî sang ebanghelyo nagkinahanglan sa sining mga pionero nga mag-sulong bisan nagakahulugan ini sa paglubong sang ila anak. Apang ginpili nila nga dalhon ang ebanghelyo sa ila kabuhi kag ginbaton ang ila mga hangkat. Natun-an ko nga ang kaukod sang mga Santos sa ebanghelyo kag ang ila determinasyon sa pagsulong gintulod sang pagtuo kag paglaum—paglaum para sa mas masanag nga palaabuton kag pagtuo nga ang Ginuo nakakilala sa ila kag makapaumpaw sang ila mga kasakit.

Ang tagsulat nagapuyo sa North Carolina, USA.

MGA KABATAAN

Mangin isa ka Pionero

S i President Monson nagasiling nga ang isa ka pionero isa nga nagapakita sang alagyan para sundon sang iban. Ano ang sarang ninyo mahimo agud tindugan kag pangapinan ang husto kag mangin isa ka pionero para sa iban sa inyo komunidad kag sa inyo panimalay? Isulat ang inyo mga sabat kag ipaambit ini sa inyo pamilya.



Pagtudlo kag Pagtuon sang Ebanghelyo

Tun-i ining materyal sing mainampuon kag, kon nagakabagay, hambali ini upod sang mga sisters nga inyo ginabisita. Gamita ang mga pamangkot agud buligan kamo sa pagpabakod sang inyo mga sisters kag himuong ang Relief Society nga aktibo nga bahin sang inyo mismo kabuhi. Para sa dugang nga impormasyon, mag-logon sa reliefssociety.lds.org.

Pagtuo, Pamilya, Bulig

Si Jesucristo nangin isa ka pu-nong manunudlo. Iya ginpakita ang ehemplio sa aton sang Sia “nagtudlo sa mga kababayin-an sa panong kag sing tinag-isa-isa, sa dalanon kag sa baybayon, sa bubon kag sa ila mga puluy-an. Iya ginpakita ang mahigugmaon nga kaluoy sa ila kag gin-ayo sila kag ang ila pamilya.”¹

Iya gintudloan sila ni Marta kag Maria kag “gin-agda sila nga mangin Iya mga disipulo kag mag-ambit sang kaluwasan, ‘inang maayong bahin’ [Lucas 10:42] nga indi ma-kuha sa ila.”²

Sa aton balaan nga mga kasulatan sa ulihing mga adlaw, ang Ginuo nagsugo sa aton nga “magtudlo sa isa kag isa sang doktrina sang gin-harian” (D&C 88:77). Parte sa pagtudlo kag pagtuon sang doktrina, si Cheryl A. Esplin, second counselor sa Primary general presidency, nagsiling, “Ang pagtuon agud mahangpan sing lubos ang mga doktrina sang ebanghelyo isa ka bug-os-kabuhi nga proseso kag nagaabot ‘dinalan sa dinalan, pagsulundan sa pagsulundan, diutay diri kag diutay didto’ (2 Nefi 28:30).”³

Sa aton pagtuon, pag-usisa kag pagpangamuyo, magatudlo kita upod sang gahum sang Balaan nga Espiritu, nga magadala sang aton mensahe “sa mga tagipusuon sang mga anak sang tawo” (2 Nefi 33:1).

Gikan sa Balaan nga mga Kasulatan

Alma 17:2–3; 31:5; Doctrine and Covenants 42:12–13; 84:85

Gikan sa Aton Kasaysayan

Ang aton nagliligad nga mga propeta nagpahanumdom sa aton bilang mga babayi nga may importante kita nga papel bilang mga manunudlo sa puluy-an kag Simbahan. Sang Septyembre 1979, si President Spencer W. Kimball (1895–1985) nagpangabay sa aton nga mangin “sister scriptorians.” Nagsiling sia: “Magmangin maalam sa balaan nga mga kasulatan—indi agud itamay ang iban, kundi agud itib-ong sila! Kay sa katapusan, sin-o bala ang may mas daku nga panginahanglan nga ‘hatagan-bili’ ang mga kamaturoran sang ebanghelyo (kon diin sarang sila magdangop sa tinion sang ila panginahanglan) sangsa ang

mga kababayin-an kag mga iloy nga nagahimo sang tuman kadamo nga mga pagbatiti kag pagpanudlo.”⁴

Tanan kita mga manunudlo kag mga manugtuon. Kon magtudlo kita gikan sa balaan nga mga kasulatan kag sa pulong sang aton buhi nga mga propeta, sarang naton mabuligan ang iban nga magkari kay Cristo. Kon makigbahin kita sa proseso sang pagtuon paagi sa pagpamangkot sing makahulogan nga mga pamangkot kag dayon sa pagpamatí, sarang naton masalapuan ang mga sabat nga magsolbar sang aton personal nga mga panginahanglan.

MGA TANDA

1. *Daughters in My Kingdom: The History and Work of Relief Society* (2011), 3.
2. *Daughters in My Kingdom*, 4.
3. Cheryl A. Esplin, “Teaching Our Children to Understand,” *Liahona* kag *Ensign*, Mayo 2012, 12.
4. Spencer W. Kimball, sa *Daughters in My Kingdom*, 50.

Ano ang Sarang Ko Mahimo?

1. Paano ako nagahanda nga mangin mas maayo nga manunudlo?
2. Ginapaambit ko bala ang akon testimonya sa mga sisters nga akon ginabantayan?